



ESI: POSTOJI NADA DA ĆE DOĆI DO LIBERALIZACIJE VIZNOG REŽIMA ZA ZEMLJE ZAPADNOG BALKANA

BERLIN/BEOGRAD, 22. MARTA (ONASA - BETA) - Prvi put u dvije decenije postoji nada da će se promijeniti situacija sa viznim ograničenjima koje je EU nametnula zemljama zapadnog Balkana, ocjenjuje European Stability Initiative - (ESI).

"U 2008. EU je formulisala niz konkretnih i zahtjevnih uslova u detaljnoj 'viznoj mapi puta'. Obećala je putovanja bez viza kao nagradu za ispunjavanje tih uslova", navodi ESI u tekstu objavljenom na svojoj internet stranici.

Ova organizacija navodi da proces traženja šengenske vize i dalje "troši vrijeme, da je skup i stresan".

"Ljudi iz cijelog regiona vide vizne uslove kao lično odbijanje. Oni ne mogu to da pomire s ponudom budućnosti u EU. Proevropski reformatori se osjećaju diskriminisano, poslovni ljudi očajavaju zbog ograničenja nametnutih potencijalnom rastu njihovih kompanija, a mladi se osjećaju zatvoreno", navodi ESI.

"Osiguravanje granica regulisanjem procedura za azil, pasoša koji se ne mogu krivotvoriti i policijskih struktura koje mogu da saraduju s agencijama za provođenje zakona u cijeloj Evropi dobro je samo po sebi. Saradnja, a ne isključivanje, najbolje funkcioniše u borbi protiv organizovanog kriminala i ilegalne imigracije", navodi se u deklaraciji projekta "Bijela šengenska lista".

ESI je uvjeren da bi proces liberalizacije viznog režima trebalo da bude transparentan.

Građani Albanije, Bosne i Hercegovine, Crne Gore, Makedonije i Srbije moraju da znaju šta se traži od njihovih vlada kako bi mogli da procjene napredak, dok "evropska javnost" zaslužuje da zna šta se u ovim zemljama preduzima u okviru temeljnih reformi kako bi se EU učinila sigurnijom, navodi ESI.

ESI ocjenjuje da je u ovom procesu najviše odmakla Makedonija, te da bi EU trebalo da osigura da zemlje koje ispune uslove dođu na bijelu šengensku listu, inače bi se, kako ukazuje, ugrozio kredibilitet procesa. (kraj)